

Ա Շ Խ Ա Տ Ա Կ Ա Ր Գ

ՄԻՋԳԵՐԱՏԵՍՉԱԿԱՆ ՀԱՆՁՆԱԺՈՂՈՎԻ

1. ԸՆԴՀԱՆՈՒՐ ԴՐՈՒՅԹՆԵՐ

1. Միջգերատեսչական հանձնաժողովը խորհրդակցական մարմին է, որի գործունեության նպատակն է հաշմանդամություն ունեցող անձանց հիմնահարցերի ոլորտում ծագած խնդիրների միջգերատեսչական համագործակցությամբ համապարփակ կարգավորումը:

2. Հանձնաժողովն իր գործունեության ընթացքում ղեկավարվում է Հայաստանի Հանրապետության Սահմանադրությամբ, Հայաստանի Հանրապետության օրենսդրությամբ, ինչպես նաև սույն աշխատակարգով:

2. ՀԱՆՁՆԱԺՈՂՈՎԻ ԽՆԴԻՐՆԵՐԸ ԵՎ ԳՈՐԾԱՌՈՒՅԹՆԵՐԸ

3. Հանձնաժողովի խնդիրներն են՝

1) հաշմանդամություն ունեցող անձանց ֆիզիկական և տեղեկատվական մատչելիության ապահովմանն ուղղված գործընթացների լավարկումը.

2) հաշմանդամություն ունեցող անձանց տրամադրվող ծառայությունների և ծրագրերի արդյունավետության բարձրացման ապահովումը.

3) հաշմանդամություն ունեցող անձանց համար մատչելիությանն առնչվող և այլ իրավունքների իրացմանը խոչընդոտող խնդիրների հասցեագրումը դրանց պատասխանատու գերատեսչություններին:

4. Հանձնաժողովի գործառույթներն են՝

1) վերհանել, քննարկել հաշմանդամություն ունեցող անձանց հիմնահարցերին առնչվող խնդիրները.

2) վերլուծել խնդիրները և տալ առաջարկություններ համապատասխան գերատեսչություններին՝ դրանց լուծման վերաբերյալ.

3) առաջարկություններ ներկայացնել խնդիրների կարգավորման նպատակային (այդ թվում՝ ոլորտային և միջգերատեսչական) ծրագրեր մշակելու ուղղությամբ.

4) ապահովել հետադարձ կապը գերատեսչությունների հետ՝ առաջարկությունների կատարման նպատակով.

5) յուրաքանչյուր նիստից հետո 10 աշխատանքային օրվա ընթացքում մատչելիության և այլ իրավունքների իրացման խնդիրների կարգավորմանն ուղղված աշխատանքների և արդյունքների վերաբերյալ տեղեկատվություն ներկայացնել Հայաստանի Հանրապետության վարչապետին:

3. ՀԱՆՁՆԱԺՈՂՈՎԻ ԿԱԶՄԱՎՈՐՈՒՄԸ ԵՎ ԳՈՐԾՈՒՆԵՈՒԹՅԱՆ ԿԱԶՄԱԿԵՐՊՈՒՄԸ

5. Հանձնաժողովի կազմը հաստատում է Հայաստանի Հանրապետության վարչապետը:

6. Հանձնաժողովն իր գործունեությունն իրականացնում է հասարակական հիմունքներով:

7. Հանձնաժողովն իր աշխատանքներն իրականացնում է նիստերի միջոցով: Հանձնաժողովի նիստերը գումարվում են եռամսյա պարբերականությամբ, ինչպես նաև ըստ անհրաժեշտության՝ հանձնաժողովի նախագահի կամ անդամների 1/3-ի նախաձեռնությամբ:

8. Հանձնաժողովի նիստերը վարում է հանձնաժողովի նախագահը:

9. Հանձնաժողովի գործունեության կազմակերպումն ապահովում է հանձնաժողովի քարտուղարը, որի դերը ստանձնում է Հայաստանի Հանրապետության աշխատանքի և սոցիալական հարցերի նախարարությունը:

10. Հանձնաժողովի նիստի օրակարգն ու քննարկվելիք հարցերին վերաբերող անհրաժեշտ նյութերը հանձնաժողովի անդամներին են ուղարկվում նիստն սկսվելուց 10 օր առաջ: Հանձնաժողովի նիստն արձանագրվում է հանձնաժողովի քարտուղարի կողմից: Նիստի արձանագրությունը ստորագրում է հանձնաժողովի

նախագահը: Արձանագրությունը նիստից ոչ ուշ, քան մեկ շաբաթվա ընթացքում տրամադրվում է հանձնաժողովի անդամներին, ինչպես նաև ուղարկվում է արձանագրված առաջարկությունների հասցեատեր գերատեսչություններին, որոնք պետք է հանձնատեն խնդիրների կարգավորումը: Հանձնաժողովի անդամների առաջարկությամբ և նախագահի հրավերով նիստին կարող են մասնակցել փորձագետներ, պետական կառավարման համակարգի և տեղական ինքնակառավարման մարմինների, հասարակական կազմակերպությունների և զանգվածային լրատվության միջոցների ներկայացուցիչներ:

11. Հանձնաժողովի կազմում հասարակական կազմակերպությունն ընտրվում է հայտարարության հիման վրա: Հայտարարության տեքստը պետք է պարունակի կազմակերպություններին ներկայացվող պահանջները, դիմելու կարգը և ժամկետները: Հանձնաժողովի կազմում հասարակական կազմակերպությունների ընտրությունն իրականացվում է՝ հաշվի առնելով, այն հանգամանքը, որ ապահովվի տարբեր խնդիրներով հաշմանդամություն ունեցող անձանց իրավունքների հարցերով զբաղվող և տարբեր ոլորտներում գործունեություն ծավալող հասարակական կազմակերպությունների ներկայացվածությունը հանձնաժողովի աշխատանքներին: Միննույն ոլորտում գործունեություն ծավալով հասարակական կազմակերպություններից նախապատվությունը տրվում է այն կազմակերպությանը, որն ունի հաշմանդամություն ունեցող անձանց համար մատչելիության հարցերով գործունեության առավել երկարամյա փորձ:

12. Հանձնաժողովի անդամի լիազորությունները դադարում են՝

- 1) նրա աշխատանքից ազատվելու դեպքում.
- 2) նրա մահվան դեպքում.
- 3) իր դիմումի համաձայն.

4) հանձնաժողովի անդամների ընդհանուր թվի ձայների մեծամասնությամբ ընդունված որոշումով, եթե նա մեկ տարվա ընթացքում 2 անգամ բացակայել է անհարգելի պատճառներով կամ մեկ տարվա ընթացքում բացակայել է հանձնաժողովի բոլոր նիստերից:

13. Սույն հավելվածի 12-րդ կետով սահմանված հիմքերից որևէ մեկի առկայության պարագայում հասարակական կազմակերպության նոր ներկայացուցչի ընտրությունը կատարվում է 11-րդ կետով սահմանված կարգով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐ

Ա. ՀԱՐՈՒԹՅՈՒՆՅԱՆ